

四庫全書

集部

欽定四庫全書

集部

客亭類稿卷一至四

詳校官庶吉士臣馬履泰

主事臣呂雲棟覆勘

謄錄監生臣黃維

謄錄監生臣范重榮

欽定四庫全書

集部四

提要

客亭類稿十四卷

別集類三

宋

臣等謹案客亭類稿十四卷宋楊冠卿撰冠卿字夢錫江陵人宋史不為立傳陳振孫書錄解題載有此集而亦不詳冠卿之始末故事蹟無可考見今以集中詩文參互考之劉季岑手帖云紹興初假守南徐楊君季洪為

理祿後三十年見其子夢錫則冠鄉為季洪之子其紀夢詩序云戊戌年四十戊戌為淳熙五年上推四十年則冠鄉當生于紹興八年己未其與傅漕詩有鄉書憶昔獻賢能姓字曾叨天府登句則嘗舉進士其上執政啟云奉命領州奪符而歸又有祭廣東主管衙土地文則嘗出知廣州以事罷職而姜夔贈冠鄉詩有長安城中擇幽棲靜退不願時人

知句則解官以後又嘗僑寓臨安者也其集
世頗罕傳惟浙江採進書中有舊刊客亭類
稿為巾箱小字本檢勘尚係元刻分四六編
雜著編古律編皆所作詩文惠答客亭書啟
編則同時名人酬贈之作不標卷數前後亦
無序跋而永樂大典各韻內所收冠御之文
尚有表牋詩餘各數十首皆刊本所未收疑
當時本各自為編流傳既久遂有闕脫今據

永樂大典所載以刊本參校搜輯補綴諸體
始全謹仿原編名目釐為十四卷而惠答書
啟編則刪之冠卿才華清雋四六猶流麗渾
雅張端義貴耳集載其館九江戎司時趙溫
叔罷相帥荆南道由九江守相合宴冠卿作
致語云相公倦台鼎喜看繡袞之東歸潯陽
無管弦且聽琵琶之舊曲溫叔舟三稱道知
其以是體擅長矣又京鏗何異李結諸帖極

稱其集杜之工而藁中乃無一篇則必其時
有別本單行而今佚之矣乾隆四十六年九

月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

容亭類稿卷一

宋 楊冠卿 撰

四六編一

表

賀皇帝尊號表

孝養東朝方奉卮而為壽道尊太極爰鏤玉以陳儀喜
溢三宮歡騰萬國臣某中賀恭惟皇帝陛下克繩祖武
允協帝華繼明以照四方茂衍邦家之慶相授而守一

道率先愛敬之規謂大任生此周王故文命承於虞帝爰極形容之美以彰歸報之誠於聖德其何以加自生民以來未有臣逢時嘉會阻遠明庭登顯冊以揚鴻休方慶母儀之盛介繁禧而緝純嘏更祈帝祉之增

代賀皇帝尊號表

奉卮為壽肇舉慶儀鏤玉揚休載崇顯號補百王之墜典溢四表之歡聲臣某中賀恭惟皇帝陛下愛敬事親聰明協帝念天高地厚雖莫盡於形容而父尊母慈宜

益彰於歸報虔諭上日不闡彌文簡冊增華典謨未有
臣屬采薇之遣戍司細柳之留屯萬壽無疆莫預龍墀
之賀百拜稽首敢伸鰲抃之恭

冊命皇后代賀太上皇帝表

詔錫慈闡厚人倫而正始禮嚴顯冊申帝命以揚庭宗
社增榮邦家永賴臣某中賀竊以二南之化雖繫於一
人兩儀之生實原於太極大哉神聖得此繼承方將隆
內治之功其可後中闡之選恭惟尊號皇帝陛下基圖

授舜聰明似堯謂王假有家以行有恒言有物而天作之合在渭之渙洽之陽從龍亦既有年配極莫先其德久已孚於衆志茲式正於徽名臣嘉與連簪具宣明訓羣臣皆稱萬歲雖阻陪前殿之趨五日一朝上皇祈永膺四海之養

賀皇帝表

王假有家天立厥配以儼尊於宸極爰錫命於帝庭衆志具孚率土咸慶臣某中賀竊以治欲隆於三代教

必首於二南况當鷄鳴問寢之朝宜有闋睢正始之后
恭惟皇帝陛下德侔天地孝通神明備九州之品以事
親簡六宮之賢而佐餽衣無曳地既克著於儉勤寶異
範金庸誕敷於典冊宗祊有喜神人是依臣仰戴隆施
欣聞盛舉朝未央而為壽雖莫稱萬壽之觴賡太姒之
嗣音願繼上百男之頌

謝太上皇帝表

執戈衛社蔑有微勞錫命自天遽膺殊渥循牆莫避揣

已奚勝臣某中謝伏念臣誤辱眷知久提禁旅惟天子
羽林之士實王官武備之儀不教而戰是為棄之先事
而慮斯謂勇也仲冬大閱肆選練於車徒六郡良家因
講習於戰陳君所命爾臣何力焉敢期帝訓之敷俾正
兵團之任茲蓋伏遇尊號太上皇帝陛下規模宏遠道
德安彊耀神武以事折衝不爭善勝貽孫謀以燕翼子
垂休無窮故雖一介之臣亦拜非常之寵臣敢不勉策駕
蹇思稱龍光移軍以復兩京或陪廟筭置酒而樂前殿

願覩慶儀

天申節賀表

處黃屋以非心降年彌永奉王卮而為壽曠典肇脩當
誕月之載臨宜率土之咸慶臣某中賀恭惟尊號皇帝
陛下功成不宰道極難名問至精以遂羣生自得崆峒
之妙乘兩儀而御六氣孰窮姑射之神與造物以俱遊
雖後天而不老臣馳心魏闕請祝聖人以八千歲而為
春方衍無疆之筭歌萬斯年之介福更申善頌之恭

天申節謝賜香表

川增栢茂衍慈極之修齡玉潤金堅拜御爐之珍賜臣
其中謝恭惟皇帝陛下聰明作后愛敬事親尊太上皇
舉盛儀於漢殿祝聖人壽騰歡頌於華封當星渚之儲
休聲羽林而致禱詔傳中侍寵畀寶薰郁郁紛紛與慶
雲而協瑞穰穰簡簡來景福以延休臣謬典周盧親承
睿渥恩被動植已洽舜孝之隆馨感神明益慶堯年之
永

代天申節滿散謝賜香表

貝葉飄經方控後天之禱寶奩錫瑞特頌南國之珍歡
動羽林聲呼崧嶽臣某中謝恭惟尊號皇帝陛下基圖
授舜聰明似堯協氣薰為太平所施者博大德必得其
壽永孚於休誕彌咸慶於薰脩贍馥敢希於沾丐茲蓋
伏遇皇帝陛下謀謨善述清淨無為五日一朝恪謹宸
廷之養萬有千歲益祈帝祉之增以一瓣香供無量佛
臣敢不對揚休命請祝聖人治馨感於神明已介無疆

之福國壽等乎箕翼更隆不拔之基

會慶節賀表

惟天祐命長發其祥既聖與仁必得其壽臣某中賀恭
惟皇帝陛下乾坤合德厯數在躬如文景之儉以濟民
心存兼愛有禹湯之明而養性道法自然方星渚之流
輝宜華封之請祝自今其始於萬斯年臣戍守淮壘心
馳魏闕作誕聖繼天之樂雖莫效於唐臣歌宜民受祿
之詩願載賡於周雅

會慶節謝賜香表

王人寵逮命畀寶薰帝祉增崇歡騰羽衛臣某中謝恭
惟皇帝陛下至誠不息明德惟馨形聲格天地之和神
聖極古今之盛誕彌厥月長發其祥於萬斯年莫知其
紀錫御爐之芬郁橫協氣以氤氳臣職忝周廬歲沾賸
馥以香而作佛事既叨君賜之榮稽首而揚王休敢祝
聖人之壽

代會慶節滿散謝賜香表

慶集北宮衍脩齡於慈極詔傳中侍錫寶炷於尚方喜溢周廬聲呼崧嶽臣某中謝恭惟至尊壽皇聖帝陛下脫屣萬乘冠德百王蕩蕩巍巍其有成功密運至神之化鬱鬱葱葱而占佳氣適臻彌月之祥虔披貝葉之文忽拜御爐之賜茲蓋伏遇皇帝陛下繼治同道篤志事親重華協帝自唐虞於斯為盛化成天下雖詩書所述何加爰以妙真香俾祝聖人壽臣敢不下拜登受稽首對揚治馨感於神明已格太和之效帝祉施於孫子更

隆奕世之休

賀太上皇帝聖壽七十表

心非黃屋膺萬壽以無疆懼奉玉卮罄四方而來賀若稽載籍蓋未前聞臣某竊以澹漠無為者形乃長生聖神廣運者壽斯必得况脫屣於萬乘獨冠德於百王心與造物以同遊年雖巧歷而莫計恭惟尊號太上皇帝陛下舉綱命舜成功似堯精一執中清靜寡欲訪崆峒之子問至道以遂羣生凝姑射之神乘兩儀而御六氣

將見後天而難老豈特從心而不踰有永之年自今其
始臣夙叨教育茲幸際逢稽首而揚王休雖莫陪於虎
拜請祝而綿聖壽敢竊效於封人

慶壽禮成肆赦代賀太上皇帝表

聖人因親教愛肇舉慶儀皇極欽福錫民式敷帝訓凡
曰含生之類悉霑慈極之仁臣恭惟尊號皇帝陛下德
冠百王壽高五帝鴻名掀揭昭乎日月以並明巨典恢
張編之詩書而無愧茲迓春祺之吉益祈寶筭之增將

金奏以充庭奉玉卮而為壽恩覃四海慶洽兩宮臣適
際昌期親逢盛典方千里者九已躋仁域之安呼萬歲
者三更效嵩高之祝

太上皇帝壽八十繳進慶聖壽雅歌表

壽臻璇極丕御常珍慶洽中宸交騰善頌欲紀形容之
盛敢伸揚厲之誠臣某竊以順帝則而不知謠載康衢
於禦寇請聖人而使壽語傳封祝於蒙莊故凡大德之
有容或取下臣之歸美矧惟盛舉卓冠前聞編之詩書

自開闢以來未有見於歌詠非文學其誰宜為尊號太上皇帝措世隆平宅心廣漠訪崆峒之子問至道以遂羣生凝姑射之神乘兩儀而御六氣甲子方周於五百春秋遠邁於八千無疆惟休自今以始恭惟皇帝陛下聰明作后愛敬事親與舜同符業業日致其孝以堯為父蕩蕩民無能名聖治益新天休滋至肆登崇於顯號旋修舉於上儀奉萬年之觴方深抃蹈奏九成之樂宜

有聲詩

慶壽禮成肆赦賀皇帝表

慶展九重茂著事親之實恩加四海爰推錫類之仁亘古未聞于今獨見臣恭惟皇帝陛下躬全舜孝性本堯仁欽福錫民期誕敷於帝訓為酒介壽咸祗迓於春祺禮文昭舉於闕庭惠澤徧周於區宇由中及外式舞且歌臣濫成邊郵恪居官守奉危而樂前殿雖莫贊於盛儀立春而下寬書幸親逢於慶典

紹熙改元代賀皇帝表

麗正化下式謹王春定朔改元誕敷帝訓遵兩朝之景
燦溢四表之歡聲臣某中賀竊惟三聖之繼興本繇一道
以相授思陵恢紹復之業既闡宏規今皇致雍熙之和
益隆不祚宜龍飛之顯號集鳳紀之大成恭惟皇帝陛下
歷數在躬聰明協帝嗣無疆之服受祉既多綿卜世
之期自今其始法五要以正事合三統而定名臣謬領
守符親承詔旨春朝之會百辟莫造駕行神笑之增萬
年惟深鰲朴

冊禮賀壽皇表

挈神器而與子尊奉慈闈登顯冊以揚休舉行曠典若
稽於古莫盛於斯臣某中賀恭惟至尊壽皇聖帝陛下
薦禹於天行堯之道脫屣萬乘雖詩書所述何加冠德
百王自開闢以來未有益謹東朝之養鼎新長樂之規
揆日陳儀奉卮為壽臣仰禮容之甚煥慶嘉會之難逢
巍巍其有成功已協帝華之盛怡怡而奉太后更歌聖
德之詩

代都統司重明節賀表

相授而守一道神聖為君繼明而照四方溫恭協帝誕
彌厥月長發其祥臣某中賀恭惟皇帝陛下德合乾坤
行高今古不基並授有大而居域中休命誕膺麗正而
化天下於赫離明之象益昭火德之符光五三六經載
籍之傳慶億萬斯年受天之祐臣分戎閫阻篋班庭曰
壽曰富而多男竊效華封之請祝卜世卜年而過厯更

祈周鼎之延洪

代馬軍行司重明節賀表

有大而居域中繼明而治麗正而化天下協帝之華當
彌月之甫臨宜率土之咸慶臣某中賀恭惟皇帝陛下
聰明時乂輝光日新重離以照四方無幽不燭三聖而
守一道有永其傳長發之祥自今以始萬斯年而受祐
其孚於休八千歲以為春莫知其極臣謬司騎旅屬遠
龍墀會前殿以稱觴莫預嵩呼之列祝聖人而使壽惟
伸虎拜之忱

代重明節謝賜香表

梵宇繙經祝聖神之睿筭寶奩錫瑞屹泰華之小山增
煥羽林共深鰲抃臣某中謝恭惟皇帝陛下至誠不息
明德惟馨薰協氣於太平之時躋斯民於仁壽之域星
流電繞適臻彌月之祥玉潤金堅爰畀御爐之寶臣敢
不祇承天寵對揚王休治馨之至感於神雖極太和之
盛聖德之大得其壽庸伸善頌之恭

代謝賜對衣金帶表

躋三衛之華祇承帝寵錫萬釤之寶貴飾身章揣已奚
勝折腰知愧臣某中謝伏念臣身名弗稱才畧非長效
楚制之短衣久居軍旅頒齊官之三服敢覩恩榮茲叨
在笥之珍惟懼終朝之褫茲蓋伏遇皇帝陛下聖神廣
運賞罰至公垂衣裳而取乾坤已臻極治聽鼓鼙而思
將帥爰示殊私臣敢不濡翼是憂書紳惟謹服之無斁
益殫衛上之忠帶賜有餘常勵立朝之節

代謝落階官表

充員衛府久負空餐閱武郊圻遽叨懋賞恩深報蔑感
劇涕零臣某中謝伏念臣猥以朴忠誤蒙眷簡執干戈
而衛社覬收汗馬之勞援枹鼓則忘身未遂著鞭之願
惟聖人有備無患謂天下忘戰必危親屈帝尊躬御戎
服蒐乘補卒於輯睦之後治兵振旅於閑暇之時耀神
武以折衝有常德以立事如臣何力而帝念功榮頌一
札之書盡略橫階之秩茲蓋伏遇皇帝陛下威加四海
勇正萬邦克壯軍容笑驪山之不整爰驅轡馭陋細柳

之徐行成禮而還推能於下臣敢不益抒愚慮仰答睿
知備器械而選車徒協贊規恢之舉謁寢園而清宮禁
庶圖克復之勲

代謝除制西總管表

守戍淮濱久積素餐之咎總兵制部尚叨明詔之除退
自省循莫知報稱臣某中謝伏念臣性愚不穎器窳亡
庸性有孤忠凜如皎日立功名而安邊境既乏能稱嚴
誅賞以馭臣隣宜加顯罰敢期易命遂許投閑茲蓋伏

遇皇帝陛下寬裕有容神武不殺故雖疵戾弗忍棄捐
錫以優恩徙之近地臣敢不益堅晚節仰答殊私收之
桑榆或奮澑池之翼靖夫區落願焚老子之庭

欽定四庫全書

客亭類稿卷二

宋 楊冠卿 撰

四六編二

表

代騎帥謝皇帝表

充員外闈曾徵副貳之勞分衛周廬遽冒淮河之列恩
隆施渥感極涕零臣某中謝伏念臣頃以朴忠誤塵任
使鯨波萬里嘗灰赤辟之舟蟻聚三湘復剪潢池之盜

幸雖天與才匪時宜居多蹇剥之憂倍費乾坤之造自
叨易命來佐成師深虞浮食之罔功敢冀出綸而示寵
矧此騎兵之籍總夫龍捷之軍近城南尺五之天既許
親於帷幄借階前方寸之地亦可罄厥謀猷斯自信之
未能實莫知其所措茲蓋伏遇皇帝陛下智勇天錫輝
光日新謂臣賦分數竒雖乏虎頭之骨相憐臣據鞍可
用或酬馬革之願言俾聯三衛之華式謹諸騎之訓臣
敢不精白承德展布事君衛社稷而執干戈仰贊規恢

之畧脩車馬而備器械更歌復會之詩

代母封內郡夫人謝表

小人有母久託廕於中闈明命自天茲進封於內郡綸
言頫暨蔀室增華臣某中謝伏念臣母某氏運際飛龍
光依渝翟旋慶坤儀之受策嘗叨宸綺以疏榮敢覬誤
恩淳躋名邑茲蓋伏遇皇帝陛下至仁天覆盛德日新
推敬老之心而及人以齊家之誠而治國爰頒殊渥首
畀外姻臣敢不祗協母心上承天寵事君親而兩盡恪

修臣子之恭兼忠孝而獨全仰副聖神之訓

代謝修奉使回叙復永州防禦使表

董因山之後誤簡眷知疏出綺之恩遽叨甄復施隆効
蔑感劇涕零臣某中謝伏念臣識昧知人法從鑄秩雖
歷時之云久曾救過之未能丹去鼎湖命閟衣冠於喬
嶽地仍禹穴會臻玉帛於塗山顧領校以何功乃憫勞
而示寵懇辭弗獲偃受奚勝茲蓋伏遇皇帝陛下賞罰
無私黜陟有序謂貶階三等街亭本謬舉之非而置邑

萬年櫟陽有囚徒之赦爰載稽於官簿俾復正於兵防
臣敢不銘佩恩榮力圖稱塞觀近臣以其所主苟或補
於明時舉其官惟爾之能庶無慙於古訓

代謝改除到任表

邊徼承流方叨誤寵宸綸易命復畀近州仰睿眷之曲
成拊微躬而深幸臣某中謝伏念臣愚無一得慮乏寸
長罔功莫副於使令薄命且更於憂患詎意掄材之末
謬應保障之求望河陽之雲靡遑將母近長安之日仍

俾臨民惠大不貲恩深曷報茲蓋伏遇皇帝陛下天臨
廣宇器使羣工謂臣嘗綰縣章粗知牧養察臣曩將使
指或任布宣簡此殊私責之共理臣敢不問民疾苦布
政中和務勸農桑少致阜蕃之效俾安田里庶消愁歎
之聲

代兵帥謝到任表

領兵閫外久負空餐典衛巖除遽叨殊渥懇辭莫獲偃
受奚勝臣某中謝伏念臣猥以凡才出際興運當慈皇

之御極屢玷使令逮上聖之繼明復膺眷簡茲頒召節
入觀昕庭曾無造膝之嘉謀敢觀出綸之誤寵矧惟衛
府遴選英豪必求文武之兼資寧許弟兄之相繼孰云
隆委併萃一門茲蓋伏遇皇帝陛下立武有常知人善
任謂臣久居軍旅粗明訓閱之方察臣有志事功頗謹
庶隅之行俾親帷幄獲侍冕旒臣敢不思答龍光益鞭
駕蹇脩車馬而備器械協贊宏規清宮禁而謁寢園力
圖後效

代池州守謝到任表

分郡國之寄已愧罔功辱神聖之知游叨錫命拜恩甚厚揣分奚勝臣某中謝伏念臣儒業匪優家聲弗紹取平平之策於定遠詭曰治民書下下之考於陽城拙於為政自玷儀曹之第屢懷太守之章當壽皇責實之朝及陛下勵精之日借玉階方寸之地三造明廷近威顏咫尺之天累勤睿獎銘佩丁寧之訓撫殫撫字之勞惟是池陽甲夫江右方采薇之遣戍有細柳之連營於此

承流難乎稱職必威愛久濟無兵民二者之分則上下
相安遂湖山千里之樂宜得才能之士以兼御牧之權
孰謂臣愚可宣德意茲蓋伏遇皇帝陛下鼎新萬化器使
羣工審政理之後先知吏治之得失修內攘外視邪選
侯謂臣嘗備於使令察臣粗諳於牧養責之共理因以
程能臣敢不勸課農桑奉行詔令問民疾苦既消愁歎
於里閭寬上顧憂更盡撫綏於軍旅庶幾一得仰答萬

分

代兵帥謝到任表

領祥刑之寄游辱誤恩分外閫之權遽叨易命退惟忝
冒深積凌兢臣某中謝伏念臣末學三庸孤忠自許鳴
劔抵掌而馳伊吾之北擔不俱生平齊下趙而會榮陽
之西戰思必克粵從去國久負空餐邊徼承流雖粗消
於愁歎古誼決獄曾莫著於平反敢期嚴召之臨更畀
成師之重眷此池陽之要地控夫江左之上游挈保障
而措之安師徒習教挫天驕而奪之氣精神折衝孰謂

臣愚可司兵柄茲蓋伏遇皇帝陛下規恢遠畧並用羣才謂臣久在兵間粗明戰守察臣曩將使指靡憚馳驅簡此殊私錫之茂渥臣敢不虔脩武備仰答睿知安邊境以立功名或庶幾於良將謁寢園而清宮禁尚克復於神京

代邊帥謝賜銀合夏藥表

六月徂暑念茲玉塞之連營一札細書錫以寶奩之名劑拜恩甚渥揣分奚勝臣某中謝伏念臣猥以凡才誤

膺遴選功名未立惟期馬革以裹屍齒髮寢衰詎知鴻
寶之為秘敢意眷懷之厚特頒御府之珍茲蓋伏遇皇
帝陛下以德行仁對時育物寓均調於藥石均休戚於
臣工屬當三伏之炎歎爰逮萬金之殊品臣敢不恪勤
職守思報恩榮推君賜而慰士心仰副睿慈之訓共武
服以定王國冀成薄伐之勲

代邊帥謝賜銀合蠟藥表

郵傳綸命恩賚寶奩當此祁寒錫之靈劑祇荷殊常之

眷益增小已之榮臣某中謝伏念臣兵昧十全慮無一
得屬歌采薇而遣戍俾屯細柳以備邊護風寒如七尺
之軀思以上策而自治陋疾病求三年之艾不知先事
以為圖方憂臣力之微敢希君賜之寵茲蓋伏遇皇帝
陛下規恢遠畧並用羣才謂臣無薏苡之疑夙勵飲冰
之節而年乏昌陽之助或有負薪之憂藥膏肓於未然
之前延齒髮於將衰之際臣敢不欽承褒詔上體眷懷
彊輔精神與士卒而同甘苦力圖報効安邊境以立功名

賤

賀皇太后加上尊號賤

聖子愛親謹慈闡之定省神孫繼志奉顯冊以尊榮振
古未聞於斯為盛臣某中賀恭惟壽聖皇太后殿下德
齊天極厚合坤元蕩蕩難名有成功於堯帝亹亹不已
生令聞之文王母儀備著於三朝內治廣刑於四海綏
多福而緝純嘏延洪有道之孫建顯號而施尊名揚厲無
前之績慶儀昭舉歡聲沸騰臣領成陪都逢時亨會眉

壽無有害願賡魯侯燕喜之詩大德必得名更誦戴記

中庸之義

冊寶禮畢賀皇太后牋

受帝祉施於孫尊居太極有聖德得其壽昭揭鴻名典冊誕敷臣民胥賀中賀恭惟皇太后殿下輔成內治宏濟中興厯數無疆方衍東朝之慶福慈兼備肇新長樂之儀端策卜龜虔諭上日範金鏤玉鋪張閨休亘古昔以未聞編詩書而無愧臣叨居戎闈阻遠闢庭與羣臣

前殿奉卮莫陪班列歌億載萬年為母惟有聲詩

慶壽禮成賀太上皇后牋

寶冊對揚方增崇於顯號王卮親捧爰肇舉於慶儀喜溢宮庭歡騰海宇竊以天地合德悠久無疆日月齊明照臨不息五百年聖人乃出三萬歲慈母亦然恭惟尊號太上皇后殿下尊協宸居厚隆坤載思齊所以聖豈惟繼太姒之音天保莫不增將克配周王之壽太上有從心之適慈闡偕難老之祥垂休無窮自今以始臣濫

分邊寄阻造闕廷建有極錫厥庶民祇仰瞻於德教受
介福於其王母願益固於壽祺

皇后受冊命代張帥賀太上皇后牋

主王化之基必先內治錫家齊之訓首正中闈中賀竊
以文母興周至于子孫而受帝祉虞嬪居汭繇歷數之在
舜躬稽盛事於前聞幸今日之親見恭惟太上皇后殿
下德齊天極慶衍宗祊母儀昔奉於東朝備饗旨甘之
養道化茲行於南國悉因付託之規爰贊睿謀以詔嘉

禮臣叨分戍役適際會通嗣其徽音喜頌恩齊之聖錫
之純嘏更歌燕喜之詩

賀皇后受冊禮牋

儼尊宸極正位宮闈顯冊對揚徽音益振臣某中賀恭
惟皇后殿下發祥於遠作合自天車輿加重翟之華寶
鈕貴範金之飾謁見祖廟喜諧神人臣適際昌期祇深
善頌二南正始已基立於太平萬壽無疆永輔佐於君

子

代賀皇后牋

重華協帝誕受丕基太姒嗣音尊崇儻極中賀恭惟皇后殿順承乾健德合坤柔成孝敬而厚人倫以婦道而化天下輔佐君子鋪張閥休修至養於東朝揭隆名於重慶若稽載籍蓋未前聞臣阻遠明庭欣逢盛舉不一書而止方闡彌文呼萬歲者三敢伸善頌

賀壽成皇后牋

贊與子之謀密傳神器盡事親之道昭揭隆名亘古未

聞於今獨見臣某中賀恭惟壽成皇后殿下慈儉為寶
清明在躬思念憂勤輔成孝敬謂堯綱命舜本一道以
相承而文母興周有徽音之是嗣章至尊而舒盛德登
顯冊以揚鴻休喜溢宮闈歡騰海宇臣際熙朝之極治
覩盛事之殊常燕翼子以貽謀已慶皇圖之永有大德
而必壽更祈帝祉之增

代謝皇太子賜頤真二字牋

前星炳煥光貫琳宮片語褒嘉寵膺亥字臣某中謝伏

念某見聞甚淺朴野亡庸修身其德乃真固所願學觀
顧養正則吉豈曰能為敢覩特書俾名寓宇茲蓋伏遇
皇太子殿下多能天縱懋德川冲推其土苴之餘見於
文辭之表筆精墨妙卓冠羣倫色正芒寒下飾萬物故
雖一介亦被殊榮某敢不寶為不朽之傳用答非常之
眷刻之金石以昭河洛之禎祥藏諸山川當使鬼神而
訶護

欽定四庫全書

客亭類稿卷三

宋 楊冠卿 撰

四六編三

啟

謝臨安趙安撫斷劉忠等人啟

伏准使帖斷遣劉忠等人為盜開本家于湖新集改易
元文追版入官押出府界者客常何之館亦既有年求
相如之文僅存遺藁方與鳩工而鋟木遽聞售偽而假

真顧此書不止則不行宜公府必懲而必誠盡去其籍
靡踰於時竊惟文籍之興莫甚魯魚之辨銘訛麋壽歐
氏特書車改金根昌黎無子眷于湖之逸軌邁漢庭之
諸公平生千萬篇垂金薤琳琅之體作詩三百首掩咸
池冥默之音詔趨上帝之玉樓公棄奚奴之囊錦微茫
手跡流落人間炳若丹青皆可傳之不朽勒諸金石庶
有補於將來惟虞震電之取將詎意雌霓之誤讀以冰
為凝以鴟為則如鄭亂雅如紫亂朱念謬於遠者由差

之毫釐況汨其真者茲十焉八九苟肆行而莫禁則壞
亂而不收是須絕去其本根毋使難圖於滋蔓紙貴洛
陽之市方傳者以爭先雷轟薦福之碑幸應焉而如響
茲蓋伏遇某官研窮百氏博極羣書以斯道覺斯民將
自任天下之重知其主信其客豈特識河南之賓去取
以公是正其失且慮入于彼則出于此又復火其書而
廬其居某得不感知已之難逢抱遺編而永嘆作春秋
而辭莫措雖絕筆於獲麟得夫子而名益彰尚著鞭而

附驥

謝友人王時舉惠書啟

特适都騎寵貺長牋借聽於聾求道於盲雖勞謙之過甚樂鸚以鍾載鶻以馬祗眩視以懷慚固自識其不足以補吾子之所須既辱賜又安得不進所有以為答蓋聞君子之學為乎道道原之大出于天曰聖曰賢以是而傳無體無方因心而會是須得於言意之表又豈求諸文字之間昧者不達本原茫乎莫知畔岸翫歲曷日

去道愈邈繺章繪句雖多奚為某求諸日用之常契彼
心傳之妙初無甚高難行之說蓋有悠久不息之誠故
雖多見闕殆多聞闕疑豈在十手所指十目所視必也
不欺於閨室居焉無怍於明神對妻子如賓接朋友以
信被鶡衣如被黻冕處圭竇如處廟堂富貴不淫而貧
賤不移道德為師而仁義為主自然與古人同堂而合
席又奚假虛言欺世以盜名賤子於斯從事之久雖未
能造道而自得且將以誠意而為先執事幸其接於門

牆有意推而納諸閨域世無夫子而欲自晦於門弟之
列人非伯樂而謂久辱於奴隸之徒請之勤勤教之云
云警其昏昏覺其憤憤懼有善而喪厥善復以能而問
不能時方螻蛭之爭鳴聲與蜩螗而競嚙鮮有相愛而
不相忌率皆以頌而不以規靜言而思則吾豈敢凡所
進左右者貴毋一毫之自欺庶來者覽觀焉因以斯言
而為戒用醻嘉惠少障狂瀾

謝中隱先生授館舍啟

挾策遠遊尚記從軍之樂曳裾旅進茲聯入幕之賓錄
孤蹤於江湖寂寞之鄉拜嘉惠於人士覩覦之表望非
所素寵至若驚竊以知人之難雖聖猶病凡賓主之交
際必聲氣之協同歷觀載籍之所傳鮮有傾蓋而相契
故常清竄名於高仙芝客仙芝止以為庸流而毛遂自
薦於平原君門平原不以為奇士況東閣軒裳之盛萃
南州冠冕之英蔚乎相扶炳乎相輝智足以謀材足以
立志同氣合樂哉川泳以雲飛事至物來燎若燭照而

龜卜苟非有擊楫誓江之志擅搞文講劍之名久而熟其行能難以枉其車幣如某者性愚不穎器窳亡庸以辯古今則愧北涯之石生以咨政事則匪河陽之溫造徒能遺外聲利靡厭乎賤貧審知重輕不苟於毫末持此自信憂乎已知未聞匠石過圃而見收肯效頑金躍冶而自獻採姓名之賤敢謂借之齒牙齧斧鉞之威又復假以詞色今者卜日而授使以禮而為羅於東都問處士之廬特招而往如伯樂過冀北之野無留其良得

非有意推而納諸陶鎔是以舉手援而出之淵壑特達
如此稱塞謂何茲蓋伏遇某官名重兩朝功蓋一世中
書二十四考方自任於安危幕府六十餘人皆可為於
將相猶折節以下於士務取人而拔其尤凡有寸長曾
不遐棄故雖賤子亦玷後塵某敢不退省其私不負所
學羅而致之幕下豈徒拜賜於軍門願之脫於囊中尚
或報知於國士

代王教授謝上舍及第并差遣啟

多士生王國覩策于庭諸侯曰頫宮命修其敎斯未能
信夫豈敢承蓋聞得賢能立於邦家致遠務先於器識
大人之學為乎道豈徒發策以決科一卷之書立之師
要在習非而勝是自里選賓興之法壞及經明行修之
詔頒舉秀才而不知書莫振益偷之俗倡諸儒而反以
朴孰回既倒之瀾與古匹休惟今獨盛尊儒術而取道
藝之士廣學校以明訓誘之方既栽培封植使之有成
宜文雅行義繇此其選一洗萬古之凡馬奚資十駕之

疲駕如某者稟姿弗靈涉道甚淺謂科斗之文廢已久時無能知而帝王之制可舉行並受其義探聖賢議論之所不到與盤誥聾牙之所未聞春誦夏弦久矣困蠶鹽於太學月書季攷茲焉登姓字於儀曹雖三益及親喜慰於心恐一行作吏便廢此事詎意濫師儒之選乃獲從庠序之遊茲蓋伏遇某官名世者英甘泉法從高文華國詩卷常留於天地之間善政宜民邦人自得於湖山之外欲作新於士類共振起於治功凡在提封不

忘甄錄遂令賤子亦冒殊榮遠勤緹騎之臨且沐無金
之貺某敢不益勵末學思稱所蒙範不範而模不模雖
乏誨人之規矩趨亦趨而步亦步尚希受教於門牆

代上執政求祠祿啟

仰翹材之館莫預下陳上光範之書輒循故事囁嚅冒
犯顙伏凌兢伏念某稟生弗靈是古成拙雖曰脩名之
不立未嘗枉道以求伸病乎在己順乎在天謬云為善
之樂薦之吾君致之吾相敢覩非常之知昨奉命以領

州將改弦而易轍謂財力殫殘之後與郡政廢弛之餘
飢餓游臻農民告病極其大當不計其細志乎公宜靡
卹乎私凡寓公遊士之須及姦吏猾胥之蠹可以去則
去削則削蓋將後所後先所先畫度夜思銖絛寸積旱
潦既為之先備兵民亦頗爾相安里間無愁嘆之聲下
皆按堵道路少流離之苦行有裏糧夫何盈篋之書乃
肆舍沙之毒雖兩怒之言溢惡識者深諒其非然三至
而母必疑古人亦將不免果致臺評之及竟奪守符而

歸自昔省愆于今越歲於祝綱之辰而名絃踈目於可
封之代而身為窮人內貽慈親非疾之憂外負宗子維
城之訓寒心銷志芒背汗顏念古以知已為難而士以
不用為耻妄意解驂而見贖故思引脰而一鳴恭惟某
官規模由稷契以來事業甲漢唐而下力扶吾道紓長
綆於千仞之艱獨贊化元遂萬物於洪鈞之播不忍匹
夫之失所務以至公而為心悼屈哀窮息黠補劓退惟
下吏久戴殊私未能報乎不貲之恩其誰納諸無過之

地願廣匪瑕之惠俾沾從欲之仁修香火之緣儻或遂
祠庭之請供菽水之養庶少寬子職之憂誓竭糜捐仰
醻造化

代謝提刑龔正言舉陞陟啟

依賓幕之芙蓉素乏元僚之譽種春風之桃李遽叨薦
牘之榮荷德不貲省躬知懼竊以古人考績三載而辯
幽明後世掄材一言而為刺舉因以觀所主觀所為主
用能簡厥修簡厥不修此道寢微澆風競肩取之下幕

非北涯石則南涯溫置在要津必燕公甥而許公裔靜
退有陸沉之患孤平無穎脫之期故晉人興讒諛互市
之譏而劉氏著勢利絕交之論昧惟膚使力障頽波宜
需名世之英俾預至公之選如某者器凡而近才拙且
踈莊樗安所用哉自不中於繩墨魏瓠枵然大也誰與
浮之江湖敢期薦引之章重借廉勤之譽茲蓋伏遇某
官居今行古以公滅私俗方趨於奔競之秋心獨憐於
寂寞之地謂溝中斷木尚或為清廟之樽而爨下焦桐

猶可備大韶之樂故雖么虧亦被吹噓某敢不仰佩名
言益遵繩檢此日預門人之列肯玷山公異時醻國士
之恩敢忘智伯

代上執政求知啟

采蘋可羞於王公盍盡忱誠之薦伐木不遺於故舊庶
興忠厚之風敢誦所聞以陳斯義魯人之附驥尾至有
互鄉之難言漢儒之號龍門或以通家而得見惟大雅
慈祥而無聽故高誼綿邈而獨傳不特斯人齋精而獻

能抑俾茲世敦厖而歸善眷惟元宰丕贊太平運甄治
之陶鎔一均造化留蓋帷於犬馬每厚恩私遂令溝瀆
之卑亦冒巖廊之峻伏念某關河墜緒籬落卑飛甘棠
之笏僅存大瓠之尊何用雖妄意封侯洴澼絖之事誰
復知盡史繫磚贏之真念曾點曾參尚對春風而豎詠
而顏淵顏路亦逢聖道之本原且父子之學俱得師承
而聞望聲名繇千載以並馳況宰輔之賢獨念故家則
胚胎涵養宜衆人所不識顧依歸之有地實幸會之自

天恭惟某官持悠久不息之誠行大公至正之道悲醉
鄉之徒而嘉良臣之烈此時思識其子孫舉羊舌之似
而代中尉之軍君子不以為偏黨軫憐寒遠靡間初終
念昔先人曾是相門之桃李今茲小子復聯材館之簪
紳旣辱問其姓名又復假以辭色謂畢萬之後必大何
陳掌不俟於今栽培封植而使之有成慰拊矜存而無
乎不至退惟下走莫亢衰宗聞華袞片言之褒增弊帚
千金之重庸持譜傳進犯等威大鈞塙北以無垠或與

昆蟲而並列蟠木輪囷而為器庶幾宗廟之見收誓畢
餘生仰酬大造

代九江倅赴任與韓守啟

舊聞暴公子知德誼之可尊一識韓荊州雖侯封而匪
願何期誤寵俾貳專城既脂牽以問塗庸消辰而奏記
恭惟某官斗南人傑山東相家世篤忠貞惟由先正而
是式政尚簡易殆非俗吏之所能帝興喬木之思笏軫
甘棠之舊疏三接之寵班聯陞六院之華提萬貨之平

冠帶會百蠻之貢屬朝廷之重外視藩方而選侯出應
時須來寬憂顧蝗不入境多黍稌而有豐年民皆奠居
安田里而無愁嘆方且洞視萬古隄障末流繼推陷廓
清之功泳渝沄澄深之旨一出於正諒回既倒之狂瀾
入觀于王遂駕孔修之四牡某衣冠落譜翰墨陳人往
赴戍期慚無政學望廬峯之紫翠敢分風月於南樓聽
潯陽之管絃姑訪琵琶之舊渚幸主盟於斯道有名世
之嗣賢誦昌黎玉潔之文或許親承於規範賡西賊膽

寒之句庶幾附麗於勲名祈嚮云深剡裁罔既

代賀宰執冬至及郊祀禮成啟

伏以圭景迎長羣陰屏息郊丘報本熙事備成率土蒙
休在庭胥慶恭惟某官至誠育物一德格天形聲協和
善政有如桴鼓詠歌不足成功可告神明屬至日之肇
禋贊上儀而領使裸鬯清廟日星輝潤以凝祥薰燎璇
穹雲物氤氳而霈澤太一貺而天馬下簫韶成而鳳皇
儀盛冠古今事光簡冊昭事上帝聿懷多福既資顯相

之勞總領衆職練核羣臣尤藉弼諧之益凡執籩而在
列皆躍冶以就鎔况夙諧東閣之趨其敢後衆人之賀
伏念某一收朝蹟幾換歲華茲預駿奔實深鼓舞周家
仁及草木方歛福以錫民宣室夜問鬼神正受釐而前
席仰大鈞之廣播成萬物而弗遺所期陽和一點之恩
以回寒谷孤根之暖

又代賀正及慶壽禮成啟

伏以歲律更端王正謹始慶儀昭舉歡聲沸騰恭惟某

官厚德春融元勲鼎盛太平無象風揮而日舒和氣致祥冰解而凍釋方明王孝理天下而華封請祝聖人克贊上儀一新巨典捧卮而稱萬歲領漢殿之羣臣歛福而錫庶民衍箕疇之皇極自開闢以來未有雖詩書所稱何加某委質化鈞逢時亨會範金鏤玉正鋪張於宏休點翰舒牋敢形容於嘉頌

代烏程宰上湖守求陞陟啟

三載考績覩侯邦風月之分一字拔人祈下體菲葑之

采方執裾而求鬻庸占辭而寓誠伏念某學昧通方志
惟好古自始一命于今幾年涸魚既急於斗升乘鴈可
計其上下題名千佛偶玷賢科遷秩中銓謬為令尹雖
無輿人我有田疇之誦而有君子必葺牆屋之心蓋百
里視民為親與諸侯均土而治小焉簿書期會之集大
焉獄訟征賦之繁嘵笑之間戚休所係折腰為米肯懷
淵明鄉里之羞學道愛人庶幾武城絃歌之意然資任
有序遷之典必守憲以名升於朝政恐寂寥而無聞是

以踴躍而自獻恭惟某官吾道之所寄命斯文以為指
南學者仰如泰山嘗闡杏壇之教郎官上應列宿遂懷
錦帳之香試以臨民與之共理方蒐獵於寒畯務主張
於材能凡有寸長曾不遐棄退惟下走夙戴殊私一辦
為南豐每勤宗仰四方逐東野莫遂親承茲試邑而罔
功幸委身而受察欵嵌可笑雖累日不離小官毀譽以
公喜三代所行直道願借鶻書之寵俾為鴻漸之階庶
聞郡吏之皆驚免使門人之不敬

又與交代張倅啟

推尋譜緒仰華胄以非遙闊決邦條繼大賢而何幸榮
雖欣於附驥愧實重於續貂恭惟某官體亮自其天資
設施本乎經術笑談之際才了十人端錯之間刃游餘
地蚤贊總儲之畫旋膺民社之除去則見思治焉稱最
為晉國保障既已著於茂功拜褒德侯封當遂受於重
賞乃适千里之逸驥來駕貳車之左轔鐵騎銀瓶重聽
琵琶之舊曲簾篁泥軾因為匡廬而少留二年于茲百

廢具舉江山得助豈徒風月之平分邦國不空復繼海
沂之歡誦宜應佩刀之約遂登要路之津某猥以屬庸
適相先後遠勤一介行李之至賢於十部從事之臨服
膺諸大夫之言乃所願學尚期舊令尹之政必以告新
庶謹奉於規摹或少逃於罪悔

又與江州都統劉御帶啟

生李晟於唐室實為社稷之基依劉表於荊州何幸旌
麾之託將消辰而就道喜披霧之有期恭惟某官誼薄

雲天忠貫日月單于適南下而牧宣王興北伐之師仗
義從君豪傑皆為響應捐軀徇國江淮亦知威名簡在
上心立登要路屬采薇之遣戍屯細柳以備邊帝念九
江營聯萬騎士卒熟練久焉法制之浸隳號令一放必
也旌旗之改觀爰膺閫寄出總戎行令行禁止而賞罰
以公車堅馬良而師徒習教以寬聖主之西顧以制天
驕於北門潛消烽燧之驚益壯金湯之勢某系出橫浦
世守朴忠擊楫清中原未遂著鞭之願摶蠡談當世每

懷憂國之心慨想知音欣逢賞鑒尚幾一見即傾蓋如
平生歡敢以尺書預通名於下執事

回馮幹啟

伏審排雲叫闔闔親結主知汎水依芙蓉來參幕畫茲
大丈夫平日所自期者豈妄男子嘗試而幸得之恭惟
某官以非常之才濟有用之學崇論闊議皆諸老所未
能言犯顏櫻鱗宜明主所恨見晚既朝奏而暮召益聲
蜚而實騰爰錫美官用彰遠業數百篇皆可為法尚力

據論諫之忠九萬里方將圖南庶及見勲庸之盛

代賀楚守向安撫啟

伏審左符錫瑞東騎殿藩共理得賢有職胥賀恭惟某官才全而器博實茂而聲閑取一障乘之固非雅志賢長城遠矣蓋有能稱帝念長淮楚為要郡控山東之門戶實江左之藩籬必求牧人御衆之才以畀宣化承流之任一麾出守僉曰往哉汝諧十乘啟行聞之喜而不寐第恐靡容於煖席已見入登於要津某久矣聞風茲

焉聯事衛中國而遣戍役敢云憂顧之分安邊境而立功名政藉餘波之及

欽定四庫全書

客亭類稿卷四

宋 楊冠卿 撰

四六編四

啟

代賀左丞相王冀公啟

伏審廷駁大號位冠元台選衆而舉臯陶雖上心之簡
在夢帝而賚傳說亦天意之協從揆路增華巖瞻益峻
恭惟某官斯民先覺命世大才文章黼黻而日新道術

淵源而海富敬王如孟子非仁義不陳於前告后若君
陳有謀猷乃順于外蚤際千齡之運徧儀兩地之華德
以施惠刑以止邪無競維烈文能附衆武能威敵克壯
其猶基立太平修和有夏十年而至宰相一德以享天
心撫五辰而庶績凝錫九疇而彝倫叙清淨寧一燕基
緒於無疆道德安強措甲兵而不用方將薦勲烈於清
廟朝辟公於明堂天子恨無官可驛吾君欲舉國以聽
久積處中之望爰膺虛左之求建為上公啟冀國封彊

之舊總領衆職昭畀司命數之隆一新袞繡之儀增重
旂常之載蓋周公有勲勞於天下遂疏曲阜之封若阿
衡實左右於商王乃謂聖人之耦惟公懋德與古匹休
聲名千載而並馳事業殊時而一致由中及外式舞且
歌某久荷生成欣聞播告河如帶而山如礪方觀封爵
之崇筆成冢而墨成池莫紀勲庸之盛聊貢得賢之頌
少伸賀廈之私喜溢于衷言不盡意

又賀右丞相梁儀公啟

伏審廷告羣工朝登碩輔人惟求舊雖帝意之所孚民具爾瞻亦師虞之攸屬廟堂增重海宇蒙休恭惟某官寬大而裕和閑深而肅括致主以孟軻之道非堯舜不敢陳於前犯顏高汲孺之風雖貴育弗能奪其勇頃宅百揆備鑿遠猶立一事必曰因民之情進一言必曰稽古之訓以獎拔賢能為當務之急以修明政教為致治之原凡所罷行審其思斅朝夕納誨莫非啟沃之忠上下相安宜無苟且之意躋民仁壽措世隆平方言聽而

計從乃功成而身退帝念一日不可去良弼公其高卧
何以慰蒼生雖云倡牧以阜民曷若代天而熙載趣介
圭而入觀當宣室之受釐遭時遇主而策萬世之長脩
身治國而獻六言之要當於上意至歛袂而動容置之
巖廊遂疇庸而申命詔還舊柄建為上公錫以山川土
田作乎股肱耳目屬季秋之大饗藏熙事於明堂乃眷
宗工俾兼使領昭事上帝聿懷多福既資顯相之勞總
領衆職練核羣臣允賴弼諧之益蓋賢臣之用舍係天

下之重輕昔裴度還朝尚致兩河之率服周公復相亦
聞四海之是皇矧夫神聖之謀謨濟以久大之德業方
懋非常之舉以永無窮之基鴻鵠一新旗常增煥某鑪
錘舊物簪履後塵聯違六符頤仰十載竿牘浸踈於記
史夢魂徒遠於宮牆茲聞顯冊之頌喜遂大鈞之託望
相君翹材之館雖莫綴於賀賓上聖主得賢之篇敢敬
陳於嘉頌

代賀左相王冀公啟

伏審朝陞宰輔位冠公台親結主知在廷無出其右自任天下得君如彼其專此古所謂社稷臣其間必有名世者慶流寰海喜溢儒紳竊惟帝王之朝莫盛虞周之際禹臯居左右而輔舜雖翼亮之匪殊姬召為師保以相成於名稱而則異蓋天道尚左有以左為貴故人主論相其於相亦然宜歟聖之有臨於古訓而是式夢帝賚良弼既納誨以代言建爾為上公遂疇庸而申命恭惟某官功熙帝載道覺民先規模由中古以還議論卑

兩漢而下措諸事業皆變龍稷契之所行發為文章有
賈馬班揚之不逮蓋膺眷簡出應時須外焉著循良宣
弟之稱內焉罄獻納忠嘉之益謀王體而斷國論在公
固無甚難移風俗以厚人倫視古可以無愧爰自論思
之禁掖進參宥密於幾庭耀神武以折遐衝享天心而
有一德樞柄直紫微之位炳四輔以騰輝靈旗收太一
之鋒偃五兵而不試然念久其事則可臨機而不惑知
其要則可應變而不窮淳放書贊於內朝表正使名於

右府恩均宰路象應泰階以昭體貌之殊榮以示安危
之注意旋宅百揆基立太平朝野歡娛華夏寧謐上而
星緯明潤下而年穀順成鼓鐘竽笙方薦殊休於清廟
紜綰衡紳復朝羣后於明堂天子恨無官可疇吾君欲
舉國以聽命正久虛之席詔陞左輔之尊封社圭腴開
冀國山河之舊繡裳公袞彰鴟司命數之隆一新簡冊
之觀增重旂常之載將見八百餘年之過厯邦其永孚
于休豈徒二十四考之中書公有無窮之聞舉世所屬

捨公其誰某夙荷知憐欣聞播告望相君翹材之館輒
有冀於無收上聖主得賢之篇敢先形於善頌惟深抃
蹈罔既剗裁

賀右相梁儀公啟

伏審大政諮詢老入觀于王舊德為元龜爰立作相復
還柄任益峻巖瞻蓋聞君臣必相與而後孚功業非偶
然而可致田千秋一言寤意而相漢竟亦無聞姚元崇
十事要說以輔唐乃能有濟惟規模之可久與志慮之

弗移故國是自定國勢自尊而治體以成治功以立苟
或隨時而遷就何以措世於隆平此理亂之所由基宜
古今因以為戒恭惟某官道尊而德貴學粹而行醇惟
前聖所行是師自中古以還不論頃宅百揆備恢遠圖
知變法易政無定慮之亂大謀以聚議進計無成說之
為深患大而要者既蚤正而素治詳而略者靡敝精而
竭神用一賢則國皆曰賢責其政效之必成出一令則
下皆稟令驗之人情而必合非天下至誠孰與此宜吾

君舉國以聽焉方侯藩率從強畏而忠懷乃天道是循功成而身退雖曰介圭之錫命咸僕袞衣之來歸蓋裴度之護北門蠻夷君長必問天子之用否而司馬之歸洛邑遼夏使人亦及我公之起居故其再領平章則使夫戎敵皆畏威而自臣復相中國則感其邊吏無開隙而生事自昔賢臣之用捨實係朝廷之重輕矧夫操守之堅貞濟以德業之久大不動聲色挈神器而措諸安不勞師徒挫天驕而奪之氣方袖經綸之手遠臨侯伯

之居中外冀望其用於朝聖神注想以待於上爰興嘆
於當饋趣入對於受釐都民罷市而聳觀野老歡傳其
再入宰相之職安百姓既人望之具孚春秋之義尊上
公宜冊書之申錫屬攷紹興初元之詔再舉皇祐大饗
之儀當先甲之肇禋總前驅而領使絃綛衡紈倡羣后
於明堂鼓鐘竽笙薦殊休於清廟神人懽悅宗社安榮
然念望之久則其應也難任之專則其責也重在三王
之右而陳五帝之上豈俟空言立千載之功而建萬世

之安當無遺算庶康乃績亦永有辭某簪履後塵詩書
餘習遭時遇主而建長策公方基於太平修身治國而
獻六言愚請事於斯語用醻知遇少答生成心之精微
文莫宣究

代烏程宰賀湖守顏寶文啟

伏審奏計南閩剖符近甸昔臨巖邑閭里猶勤於去思
今布藩條襦袴競歌於來暮叨居蔭樾倍激歡悰惟吳
興之名邦號浙右之道院帝城不遠適多南陽之近親

治效未聞允藉西京之循吏庶幾以詩書禮樂而為政
俾足於魚稻蒲蓮而不爭恭惟某官一善服膺而勿忘
深造逢原而自得剛而有禮惟公言則萌於心信於其
君反諸已而得其正頃以民社循良之最入居天子耳
目之官一新儀注於容臺旋罄論思於起部謂膺眷簡
進秉事樞乃寓直於中奎俾出將於使指特書異等之
效茲有非常之褒申錫贊書易填藩輔先聲載路山嶽
動搖東騎殷邦旌旗改觀矧平原之忠體儼遺像於丹

青如烈日嚴霜望之凜然其流風善政猶有存者緣奚
斯頌魯之義諒有繼於前脩易元真泛宅之舟豈但親
於細務第恐未黔於墨突已聞促治於曹裝某濫廁治
民慙無政學跡雖遠於賓閣夢惟遶於宮牆方虞浮食
而罔功何幸委身而受察地方百里顧閭閻疾苦以奚
知我有二天喜風雨震凌之可免

代賀潭帥黃樞密啟

伏審力解鈞樞寵臨帥闈折衝萬里既嘗展於經綸偃

息一方自不勞於談笑明命誕布歡聲沸騰况夙陪賓
闈之遊奚敢後衆人之賀恭惟某官斯民先覺命世大
才文章以孔孟為宗每下視班揚之輩事業陋漢唐諸
子謂不能堯舜其君非仁義則不陳於前有謀猷則入
告于內惟直身而行道不枉已以徇人雖畏塗欲起於
風波而素履弗渝於金石單于適南下而牧宣王興北
伐之師從西清次對之班進右府本兵之地自得師中
之吉果收堂上之奇今皇帝移軍恢復兩京任舊人共

政使宅百揆宜居四輔三公之列往專五侯九伯之
征何成功而不居且抗章而有請帝念老成之去詔
司屏翰之雄豈非將獨贊於化鈞於是必詳試以吏
事泰山巖石詎久虛民具之瞻袞衣繡裳諒即播公
歸之詠某漂流薄宦骯髒餘生幼從鄉里之小兒幸
識海濱之大老天其或者我有遇焉負縣令之弩前
驅茲逆行旌於異郡念吾黨之子狂簡尚覬先生之

一言

代莫幹賀廣東提刑龔正言啟

伏審錫命宸庭觀風嶺嶠先聲所暨信山嶽之可搖不
令而嚴知江河之莫犯凡叨蔭樾倍激驩悰惟某官
斯文以為指南吾道之所寄命胷中浩氣曾不點綴於
浮雲物外秋毫未始較量於末俗視功名為餘事守節
義之大閑頃繇道家蓬萊之山進司天子耳目之寄痛
姦回之在側盜名器以招權啟搢紳奔競之風紊朝廷
清明之政櫻逆鱗而諫謂宜鑒覆轍之車正兩觀之刑

幾欲請上方之劒坐致金吾之落膽益隆鐵面之蜚聲
旋聞奉常之除亟上封章而去放懷觴詠袖手經綸雖
愴人欲鼓於風波而素履益堅於金石茲為蒼生而起
來宣直指之威當道理輪諒必誅於封豕援經折獄豈
徒總於祥刑第虞墨突之未黠又促曹裝而入覲某關
河墜緒籬落卑飛十五年困州縣之間尚淪計幕數千
里涉川塗之險來赴戍期顧蝸蠅之末所得幾何無田
園之歸其窮至此況當內修外攘之際未免行齋居送

之勞非有託於帡幪曷可逃於罪悔言如良藥願見枕
中鴻寶之書祿必素餐免坐枉後惠文之法

代李倅賀湖守趙徽猷啟

伏審左符錫瑞東騎易藩宏開刺史之天益近長安之
日異數優渥僉言允諧恭惟某官崧嶽儲神天潢毓秀
文王之昭武王之穆莊公之子周公之孫處富貴而不
驕雅知為善之樂通古今而有補尤高博物之明憶昨
請命於周俾侯于魯其治有異等之效以自結明主之

知爰陞延閣之華更畀名邦之重非特遂過家之適抑以榮衣錦之歸歷考熙朝惟重長吏凡分二千石共理之寄必需五百年名世之英茲觀父子之並為實謂衣冠之盛事在彼無惡在此無斁宜臻令譽之攸終俾熾而昌俾壽而臧俱慶侯邦之永保第恐御屏之隔座靡容墨突之已黔某漫浪奚為侵尋且老南陽之勸耕興利昔親召父之賢雲間之泛宅浮家今作真卿之客屬有負薪之疾阻修維梓之恭小大從公雖莫聽鑾聲之

噦中和宣化尚覩倣鹿鳴之歌喜溢于衷言不盡意

代都幹賀平江守王待制啟

倡九牧以阜民夙仰榦方之略衛中國而遣戍茲聯賓幕之遊雖分職以甚殊實事賢而為幸冒干齋斧庸貢吏函恭惟某官卓然公輔之姿加以聖賢之學上三道之要諸老生皆未嘗言塵乙夜之觀明天子所恨見晚亟上蓬山而寓直遂陞荷橐之從班屬詔羣工迭更外服謂申甫昔生於崧嶽而頗牧今在於禁林宣力四方

汝為則予一人以憚保是南國錫以介圭逮潢池之弄
兵有綠林之干紀爰起牙璋之旅命分玉帳之弓元戎
十乘啟行采入其阻王師大獻奏凱式遄其歸宜聞當
軸而處中乃復擁麾而出守先一州而後天下在公固
無甚難會諸侯而選車徒舉世孰尸其任願建久長之
策入恢宏遠之圖某漫浪一官侵尋半紀抱膝而鑒梁
父徒懷憂國之心擊楫而清中原未遂著鞭之願來贊
樓船之畫誓然赤壁之舟聞分陝而得名公喜過江而

見王導郤匈奴者七百里雖云賢過於長城擢毛遂於十九人或預請行之下客

代賀蕭司諫除諫議啟

伏審擢自諫垣首司言責大夫視上卿於列國位望益尊天子有爭臣者七人選用茲重知人善任非聖孰能恭惟某官性極誠明道參經緯卽官上應列宿初懷錦帳之香學者仰如泰山旋闡杏壇之教爰書人主之言動進班宰相之會朝補闕拾遺有犯無隱故朝廷推為

宿望欣聞諫議之得君謂天下必致太平咸簉廷英而
言賀眷方虛己以問政至或歛袖而動容既策陳萬世
之長宜治冠百王之上公有無窮之聞邦其永孚于休
某誤辱恩憐每勤宗仰斯民而使共理方叨符竹之分
明主之登直臣切奉絲綸而喜其為慶幸罔既剗裁

代陳監與常熟知縣啟

去田畝而就吏祿濫司關市之征執手版而拜上官行
覲宮牆之美欲布姓名之賤庸馳竿牘之誠恭惟某官

心造道原識通世務休有令聞揚于清時若高陽才子
不墮其名在漢廷諸公無出其右來臨巖邑宣布教條
鳴琴而不下堂游刃而有餘地為晉國保障既已著於
茂功拜褒德侯封當遂受於重賞某夙勤仰德茲幸依
仁事大夫之賢儻官謗之能免報國士之遇宣私心之
敢忘

又與兵官啟

十舍相望未見君子六聯合治茲同官僚敢以尺書布

之下執恭惟某官氣剛而志烈聲蜚而實騰屈臨花縣之封坐息潢池之盜顧計畫有可采者未殫利國之謀謂將軍何以教之行慶登壇之拜某浮家苕渚馳志伊吾安邊境而立功名莫遂長纓之請登龍斷而罔市利姑為斗粟之圖所期欵奉於誨言或可少逃於罪戾

又與交代王監鎮啟

觀宮牆之美未契夙心典關市之征茲塵交契已涓辰而就道庸占詞而寓誠恭惟某官才了十人氣吞餘子

小試煩劇備見設施數千牛刃若發硎其游恢有餘地
九萬里風斯在下而今乃將圖南既騰課最之書宜被
褒遷之目某自慚不穎見謂亡庸何幸一官且繼高躅
則其不遠惟賢者善於前修政必告新庶後人沾其賸
馥我所願也公其圖之

代上戶部呂侍郎啟

伏審親結主知進司民部賦不加而用足惟公克明源
之深而流長自今以始誦傳四遠欣歎一詞惟邦計之

甚繁實聖心之攸屬銅楮之幣迭有情偽道路之言方
興怨嗟既弊端之益滋奚法禁之可後是必酌古今以
為之制因以量貲幣而救於時使無彼輕此重之私庶
見利興害除之效疇容是寄允屬通儒恭惟某官心造
道原議明國體論思獻納蓋嘗造膝以盡言盤錯糾分
無不迎刃而立解妙膺帝簡式應時須宜未占而已孚
致有識之咸慶尚觀渙渥益以車千秋之封豈特紓民
異乎東野畢之御某曩遊淮水數拜光儀遠官海壠寢

踈聲問久矣及瓜而受代茲焉垂橐以來歸旣塵金魚
貧窶莫遑於朝夕天吳紫鳳倒披忍見於兒童徒能書
空咄咄奚為哉未知此身漂漂如何耳欣仰士安之鞭
筭願彈貢禹之塵冠雖里人何取於效顰諒匠石不遺
於堊鼻蓋平生一丘一壑未嘗為世俗道之惟祇今三
沐三熏庶幾從我公遊者恭俟進退以卜窮通

代謝提領顏侍郎辟差啟

攝官承乏方懷尸素之慙拜命為真遞荷陶鎔之寵得

踰望外感越情涯竊惟邦計之原莫重酒酤之擁魯康
立均盧之制蓋慮費財而傷民弘羊兼鹽鐵而云亦謂
安邊而足用去古既遠流弊益滋分職設屬而每以為
難以私害公而弗勝其患不有君子孰清官曹宜需當
世之才能俾預有司之出內如某者二中四下百巧千
窮敢謂知憐誤加甄擇既與互鄉之進復取鬷明之言
越尊俎以代庖人方廁具僚之末舉管庫之謂賢者乃
騰公府之書退省其私夫何能稱茲蓋伏遇某官羣工

冠冕萬事著龜昔總臺綱本仁義而論諫茲提國用知
財貨之源流思為官而擇人務遏惡而揚善故雖么膺
不忍棄捐某敢不仰佩恩榮恪勤職守為委吏而會計
雖無涓埃補報之能依夏屋之帡幪知有風雨震凌之
託

代幕屬與交代啟

伏審顯膺詔旨密贊臺綱賓席增華吾黨胥賀恭惟某
官世濟其美國皆曰賢聳壑昂霄夙抱梗楠之用篤雲

追電尚淹驥驥之馳帝興喬木之思命畀紅蓮之幙錢
流地上諒收富國之功人至日邊遂慶蜚郵之名某久
勤嚮慕茲玷交承揚粧在前愧乏告新之政傾蓋如故
覲資藏嫉之仁

